

**PROGRAMMA**  
**QVO**  
**UNIVERSITATIS ROSTOCHIENSIS**  
**RECTOR**  
**D. BERNHARDUS**  
**Barnstorff**  
**POLIATER ET MEDIC. PROF. PUBL.**  
**FESTVM**  
**PASCHALE**  
**CIVIBUS SUI INDICIT**  
**AC**  
**DE RESUSCITATIONE PLANTARUM**  
**TRACTAT.**



**ROSTOCHII,**  
**Typis JOHANNIS WEPPLINGII, Univ. Typogr.**

131







X arte Chymica hodie mihi Scriptionis argumentum sumo; postquam proxime abhinc sub figura curationis corporum, quasi transfusionem Sanguinis dominicæ passionis memoriam proposui; & ante hac ex naturali disciplina Lucis materiam ad Servatoris nativitatem simili commentatione accommodavi. Neq; enim impedit vario Sermone indutam, atqve alio subinde cultu exornatam producere veritatem. Non ipsa hæc quidem; non salutaria,

(1.) 2. Cor.  
XII. 16.  
(2) Phil. I. 18.

quæ scribimus, monita talem sermonis figuram requirunt: Sed tædio occurritur legentium. Sic etenim res est, ut quotquot sumus homines, quadam profundissime insito naturæ malo non modo ipsi, quæ meliora esse novimus tamen supine negligamus, verum etiam nihil facilius, quam pie monita ad nauleam usque fastidiamus. Me autem jamdudum artis meæ usus docuit, medicinam quam delicatioribus injucundam fore credidit auro illinere, aut confecto bolo palatis accommodare, aut quæ ipsis maxime adversa esse noveram, oppido dissimulare. Fieri sane non potest, quin intimum cognationis genus, quod corpori intercedit ac animæ, communem hunc utriqve efficiat morem. Fallor enim insigniter aut certe ipse gentium doctor, quod ego de medicina nunc dixi, in pietatis promovendæ negotio fecerat, quando astu sibi captos esse scripsit (1.) Corinthios eo quod gratis docuerat; aut quando gaudii Significationem fecit, de progressu Evangelii, (2) sive per manifesta veritatis vestigia, sive per Prophasim. Prophasim ergo, cum Vos hodie de pietatis officio memoriæ JESU resuscitati ex mortuis debito compellandos habeo: quid Vetat, quin repræsentare queam? Nolite enim à præsentī Scriptura expectare, aut prolixam de resurrectione mortuorum disputationem, aut explicatam e Sanctoribus literis sententiam: hoc etenim è publicis, quæ per has ferias cogentur, Concionibus larga manu vobis promitto; illud autem Superfluum fore existimo, eo quod rei fidem vel simplicissima pietate quisq; confirmatam habet, aut certè habere debet. Est nempe in Chymicorum Scholis nomen *resuscitationis Plantarum* tam Solenne tamq; Vulgatum: ut si illius apud scriptores frequentissima mentio veritatis argumentum pareret, inhumanus sit oportet, qui rem ipsam in dubium adduceret. Tota autem Commentī ratio hæc est: Posse ex herbarum cineribus artis lege confectis,

58790 (50)





fectis, atque vel ex rore vel foecundo quodam alio liquore prae-  
tibus, in vitro clauso & ad ignem modeste relato aut herbam, aut  
saltem illius Speciem revocari. Artificio leges praescribi solent, quae  
consequuntur. *R. Semin: ex herba, quamcumque volueris Libr. IV. con-*  
*tundatur in mortario, atque alias probe asservatum circa vesperam libe-*  
*ro ac sereno aëri exponatur ut rorem deciduum ad satietatem imbibat.*  
*Eodem tempore excipiantur matut: roris mensura IIX, quae distillantur*  
*prius, & è relictis fecibus sal extrahatur, qui in rore eodem denuo*  
*solutus, massae seminis superinfundatur ad altitudinem digit. III. Vi-*  
*trum hermetice obsignatum per integrum mensem reponatur in ventre*  
*equino usque dum substantia seminis in gelatinam transferit, cui inna-*  
*tabit ros colore perquam viridi tinctus, & in Suprema parte Spiritus*  
*quasi Curricula variegata conspicietur. Quo facto idem, si caelum serenum*  
*fuerit tamdiu solis atque astrorum radiis exponatur; Sin autem turbi-*  
*da tempestas fuerit in loco temperanter calido constituatur: donec pi-*  
*tuitosa materia ex fundo sese extollat altius, expiret superius ex-*  
*tensa cuticula, crebri vapores intra vitrum observentur, & tandem*  
*omnis illa interior compages transeat in albicantem atque caerulem cinerem.*  
Ajunt rei autores exinde, quoties libitum fuerit, vitro aliquan-  
tisper incalescente, posse produci plantae figuram, folia item ac  
flores exactissime referentem, quae tamen igne remoto subsidat  
illico & evanescat. Descripsit hunc rei peragendae modum ex Hars-  
dörffero Schottus, (3.) ex illo Kircherus, [4] atque ex hoc vicissim  
Erasmus (5.) Francisci, & nescio annon ex ipso (6.) Tackius, utut  
is dudum ante visum Francisci opus eam resuscitandae plantae rati-  
onem in arcanis sibi fuisse causetur. Enimvero si vel maxime ea via  
negotium procederet, non tam ex cinere, quam è vero semine, eoque  
tot modis foecundo planta exurgeret, neque tamen quidquam  
aliud nisi phantasma & umbrae lusus exinde fieret. Nolo autem  
prolixior esse in recensendis, quae magno numero obstant, ratio-  
nibus: quales sunt notante ipso per ignem Philosopho; quod reda-  
cto in cinerem frutice, illud quoque emoriatur ac pereat, in quo  
viva olim recentis herbae virtus posita fuerit; item quod qui natu-  
ram ea ratione invitam quasi & contra seipsam agere cogant, nihil  
omnino proficiant, sed ubi ad summa deventum sit, forte ludentem  
naturam experiantur, nisi seipsos prorsus egregie fallant. Ex Con-  
tingio, atque item aliis, quibus de suo pondus insigne adjecit, expe-  
rimen-

(3) *Technic.*  
*cur. p. 886.*

(4) *Mund.*  
*Subterr. L. 12*  
*p. 414.*

(5) *Sines.*  
*Eust. Garten*  
*p. 760.*

(6) *Phas. So.*  
*phic. III. p. 46*



7) *Noct. Chriſt. Exerc. II. S. 27. ſſ.* rimentum illud confutavit Celeberrimus inter nos perque omnem Eccleſiam [7] FECHTIUS. Sed cum in noſtra ſcientia, ſuprema ſit autoritas, maxima probandi vis & omne prorsus arbitrium apud experientiam: merito etiam iudices ſuſpectam eſſe rem de reſuſcitatione plantarum, & in qua obſervatores ſuam ſibi met ipsis credulitatem imponere paſſi ſint, & quem tot laboribus tamque diuturna expectatione redemerunt fucum, eum pro rei ipſa ſuſcipientes, denuo venalem lectoribus fecerint. Quamquam enim ſoleant interdum fallere experimenta aliorum, ſi quis alius minus providē eadem faciat, quod ipſum peculiari tractatu Boyle perſequitur: Subinde tamen unus itemque alter citius falli præſumitur aut fallere, quam omnis reliquorum artificum cohors rem oſcitanter agere aut negligenter. Offendit nempe experientiæ defectus tantopere

8) *Epla ad Spicilli Tractatus de corpore glorioſo* (8) Henrici Meibomium ut jam dudum is non dubitaverit modo, ſed propter id ſolum, ſemotis quibuscunque aliis incommodis plantiſſime negaverit poſſe reſuſcitari plantas. Scilicet ſic res eſt, & quia ſuperius enarratum *ἐν ᾧ* ad ſolos; quos dixi autores, pertinet, reliqua quæ forte ex Qvercetano aut Gaſſarello aut Libavio aut Borrello afferuntur, primum fontem agnoſcunt Medicum quendam Polonum, qui vitreas ejusmodi lagenulas magno numero circumgeſtaſſe, atque varii generis plantas in iis ad ignem admotis exhibuiſſe fertur; quod quamquam verū eſſe largiar, tamen non immerito dubitares, annon impoſtor ille fuerit aut malas cœteroque artes exercuerit; Denique quicquid ſigillatim aliquos annotaſſe legi, de lixivio aut aqua ſale cujuſdam plantæ infecta, ſi congelentur illius figuram referentibus; de aceto Squillarum in Tackii vitro ſquillas repræſentante; de reliquiis ſucci malorum Cydoniorum gelido aëri expoſitis in figuram ipſius arboris concreſcentibus, & ſi quæ ſunt alia: non dicam quidem me illa pro fabulis reputare, crederem tamen in eorum experimentorum claſſem reponi, quæ ſpectatores requirant, qui quod velint haud difficulter ſomnient, quodque viſum eſſe cupiant, id præſentiſſime ſe intueri opinentur potius, quam credant. Mireris tamen; qui fiat: ut in retam lubrica, tam inutili, ac pene dicerem vana tanti tamen viri non modo ſtudioſum conſumſerint & induſtriam; ſed fidem etiam ipsis deſponderint: & quæ facile crediderunt; partim ne erraſſe viderentur; partim ut novi quid, inveniriſſe cenſerentur; aliis quaſi ipſiſſimam veritatem propina-

rint?



rint? Tantoperè in isto sibi artificio placent, qui ejus veritatem tuentur; ut vix alio quam regum aut principum aspectu id dignius esse prædicent: imo, quo aliquo gradu propius sit divinæ autoritati, *Ferdinando III. Romanorum Augusto* methodum superius expositam adscribunt. Quin, quod certe in Cartesii patrono ac parentatore vix reperiri posse credas (9) Borellus arcum eotenus intendit; ut quæ hæcenus dixi pro quotidianis habens, parturire se scribat inventum ejusmodi, quo quoscunque confusos liquores sale inde extracto in pristinæ originis figuram revocare atque dijudicare velit. quin de animalium deque ipsorum hominum specie ex cineribus per Chymiam reducenda quædam addit, anxie admodum rogans, ne sibi inventæ rei gloriam quispiam eripiat alius. Æqua sane petiit, dignus qui eadem impetraret: nam neque is inventi gloriam occupavit, neque à cuiquam potuit eripi. Quod si tamen ego quidpiam conjicio, causam ejus rei esse statuo: bonos viros cum viderint forte difficilem esse ex rationis judicio resurrectionis mortuorum probationem, & virtutem verbi divini nimis proterve hic à quibusdam atteri, voluisse (namq; molliter nunc de iis sentiam atque meliori ipsos animo egisse supponam, quam opinione) opem ferre pietati. Atque si demonstrandi facultatem ex natura ipsi haberent; posse ex cinere illud reduci, unde ille enatus fuerit: tum crediderunt se necessitatem imposituros cæteris, atq; vi argumenti ad divinæ potentia fidem omnes veritatis hostes cogi posse. Decebat tamen eos reminisci, quod ipsi bona mente quærebant argumentum, si vere effecissent, magis fortasse fraudi, quam emolumento fuisse doctrinæ de corporum resurrectione. Quid enim est pronius empæctis, quid frequentius agere, quam ubi audiunt per naturam fieri posse, quod nos fidei mysterium esse perhibemus, illud jam ipsum eludere & tandem impudenter proculcare? Recordari debuerant, studio illo præpostero res præternaturales præstandi insidias strui divinæ providentiæ: ad quam cum spectet illud, quod ex semine emortuo ac putrido novum prodire faciat fruticem, nonne ejus virtutis gloriam impetunt, qui suo Morte flores elicere aut plantas gignere adoriuntur? Eam autem, de qua dixi, rationem aliquos induxisse, aut id facere potuisse ad fidem resurrectionis plantarum exinde colligo: quia nihil est in omni isto artificio, quod non transsumtum sit è schola theologorum, & reapse conveniat

(9) *Observ.  
Cent. IV. n. 61*



in resurrectionem mortuorum. quod ipsum brevissime adhuc elo-  
quar. Nunquid enim est aliud illa artificum circa plantas resusci-  
tandas varietas; quæ alii ex aqua cum cineribus sale congelata, alii ex  
mero sale, ex plantæ substantia alii materiam sibi petunt o-  
perationis: Nunquid ea aliud est, quam vestigium, veræ ex mor-  
tuis resurrectionis? Audiverunt nempe illi, humani corporis re-  
liquias, quocunque demum pervenerint, siue in undis fuerint dilu-  
tæ, siue in vermium aut ferarum nutrimenta cesserint, siue in ter-  
ram reversa sint ac permutatæ conservandas tamen esse, & olim  
suo quasque corpori restituendas. Hinc emerfit suspicio, ex in su-  
perstitio: plantarum vitalem Spiritum, cineribus inclusum, quo-  
modocunque illi diluti sint aut macerati, tamen lege artis in pri-  
stini ordinis formam posse restaurari. Porro quia corpora de mor-  
tuorum putredine primam corripit ac tandem in pulverem transire  
videmus, & tamen ex eo cinere menti pristinum pollicemur ha-  
bitaculum, quando pulvis ille ac dispersus cinis elevabitur ad glo-  
riam æternæ salutis: Inde revera primum suscepta est cogitatio, de  
producendis ex cinere suo plantis, unde alii ad arbores transilie-  
runt; alios ultra etiam intempestiva abripuit audacia. Sed quod  
illi maxime voluerunt dare effectum, id vicissim ex resurrectionis  
doctrina mutuati sunt. Nimirum plantam ita vellent restituere,  
quasi olim integrum atque intemeratum corpus reddendum no-  
bis est scriptura divina didicerunt. At quia ipsis etiam fatentibus  
planta ipsorum iudicio restituta nihil nisi nubecula est aut vapor;  
quamdiu ignem habet suppositum agitur eo modo ut videatur  
esse aliqualis plantæ effigies, (qualis & ea ipsa fuit, quam olim me  
alicubi vidisse memini) sicubi, quæ minus comparent, quæque  
figuræ defunt, ex ingenii sui felicitate velis aut simplicitate ad-  
dere vel corrigere. Quæ cum ita sint, valeant illi cum imita-  
mento suæ resurrectionis mortuorum: quippe toto cœlo errant,  
& cum res ipso atque numero idem corpus integerrime restitua-  
tur olim; ipsi ne quidem genuinam rei incineres redactæ umbram  
exprimunt. Quando autem de Chymicorum igne, communi  
omnium rerum menstruo audistis, ejus præcipuam opem esse in  
artificio allegato circa plantas: tum vosmet meministis, nobis  
quoque ignem & caloris efficaciam expectandam esse, quæ non  
porro est longinquo crepare, sed propemodum præsens hoc adu-  
rere videtur seculum. Nonne enim pleraque, quæ carnem no-  
stram



stram circumstant , quæque per universum orbem dispersa sunt,  
indiciū facere videntur , tempus illud factū quasi imperu in nos  
irruere & proxime abesse , quo rerum principiis ac naturæ ru-  
dimentis calore ac æstus vehementia liquefactis , concutientur  
mortalitatis humanæ rudera & extremum sententiæ discrimen  
inibunt. Quidli autem præterea scire velis, annon & illud ex-  
chymica resuscitatione ad veram adplicare liceat , quod illa qui-  
dem non uno apud omnes temporis tractu successum habuisse ob-  
servetur : Scriptores etenim mihi supra nominati , alii experi-  
mento tres alii plures impendendos fuisse menses alii item bienni-  
um & ultra testantur. En Tibi pronam viam. Non omnes enim  
uno resurgemus tempore , namque alio eosque plurimos omni-  
um extrahet sepulchris extrema iudicii dies ; sed illud tempus ,  
qui cum servatore resurrexerunt , anticipasse , quis vestrum est ,  
qui nesciat. Quid ? quod unius est itemque alterius illa sententia  
Theologi inde à resurrectione Christi omnibus seculis & per hæc  
nostra etiam tempora ex majoribus nostris pie defunctis aliquos  
resurgere & communem illum resuscitandi terminum antevertere.  
Denique , nam finis scribendi esse debet , quicquid in Chymica re-  
surrectione fundamenti locum habet aut speciem , de sale planta-  
rum omnium vitali spiritu , eodemque indelebili : illud non nisi  
ex veteri partim figmento de animarum transmigratione & Spiri-  
tuum animalium hinc inde factū comæatu , partim ex scriptura-  
rio de salis natura sermone coaluit. Ad quod posterius præsidium  
ipse etiam Tackius sese recipit , & ex salvatoris dicto de sale terræ  
suam propugnat sententiam. Non diffiteor autem doctrinam saluta-  
rem de Christi merito & fide divinæ gratiæ salis vocabulo denotari ;  
propter eam vim quam exercet in nobis , ut non modo animam no-  
stram ab æterna morte præservet , sed corpus ipsum etiam vitali  
quodam Spiritu imbuat , quo possit olim reviviscere : Unde vos  
agnoscitis desumptam esse de sale principio resuscitandæ plantæ fa-  
bulam. Meum non est decidere quæstionem Theologicam utrum  
pii æque ac re probi per meriti Christi virtutem olim sint resur-  
recturi illud autem facere nequeo quin vos cohorter , Cives : ut  
sive res ita se habeat , ne in perniciem vestram merito Christi ad  
refurgendum olim uti debeatis ; sin autem soli pii per Christi me-  
ritum in vitam sint redituri , ut operam adhibeatis omnem , ne  
alia ratione exsuscitemini. Certe omnium ratio maxime tuta erit,  
ut



ut pietatem colatis : tum quocunque res ceciderit, ubique per  
Christum salutariter expergiscimini. Atque hoc ipsum est dicen-  
di caput, quo vos hodie quam maxime velim. Me autem moni-  
tore vobis opus esse non judico modo illud à vestra obtineam  
pietate & in salutem vestram studio & adversus honestos mores  
amore : quo dominicæ resurrectionis memoriam sic agatis ; ut in  
Christo vos peccatis mortuos esse, cum ipso autem ad vivam fidem  
ac genuinam pietatem, resurrexisset, ac per ipsum tandem coele-  
stis gaudii participationem conscensuros esse, non modo apud  
conscientiam vestram sitis persuasissimi, sed in laudem Patris, qui  
in cœlo est, omnes alii sentiant. Hoc vos agentes porro agere  
instigabunt sacri oratores his feriis undique prodeuris ; his stu-  
diis vestra adjungite, iis frequenter adeste, & nunquam nisi me-  
liores ab ipsis recedite ; patientes correctionem si extra statum  
pietatis, ac emendationem si intra illum versemini. *Ex illo sane ni-  
mum quantum projecti sunt illi, de quibus publica est ad me querela de-  
lata, quod potissimum in aede Mariana, durantibus ipsis sacris è regione  
Sacri suggestus, discursitent obambulent murmura concitent, profane  
agant, & quæ non faciant instrumenta divinum præconem turbandi  
& offendendi auditorium. Si quid ergo precibus apud illos effici potest  
aut mea auctoritate ; per eam illas obtestor ut impofterum in abstineant  
discursitationibus : quæ uti Deum graviter ledere videntur ; ita tandem vel  
me, vel aliū quemcunque magistratum ad severiorem provocabunt animad-  
versionem.* Agite cives postquā vidistis hodie quam ego de plantarū  
resuscitatione tenuiter existimem : vos tamen me excitare ad pietatis  
studia volentē benigniter accipite & promptissime audite. Solemus,  
uti circa prolem suā cuius licet in inventis nostratibus ambitio si esse.  
Nolo ergo vos ignorare quod cum vos hodie quasi plantas in spem  
patriæ & divinæ gloriæ succrescentes curandos habeam atque re-  
gendos : me vehementer gavisurū esse, si quidem mea auctoritate par-  
tim ac vestri officii lege illud assequerem, ut talem inde ab hodi-  
erna die morem induatis talem vitam agatis : quo omnes vide-  
ant & mihi concedant quod vobiscum pietatem ac tranquillita-  
tem academicam meo magistratui ; successori autem meo cives  
probos atque egregios ; patriæ vestræ solidam spem mayo-  
rumque vestrorum detritos cineres omni Chymi-  
câ arte feliciter resuscitarim.

P. P. Sub Sigillo Rectoratus ipsâ feria Paschatos 1703.